



UPA 2015/063
24. marts 2014
Kalistat Lund

Inatsisartut aalajangiiffigisassaattut siunnersuut Naalackersuisut peqquneqassasut Nukissiorfinnut nalunaaruteqaqqullugit, akinut suliffeqarfiup allattorsimaffiani allaqqasut allangortineqassasut, siunissami ima allassimalerluni innaallagissamut atuisut nunami aalisakkanik suliffissuarnut innaallagissamut akikillisaaffigisaraat aammalu imermik atuisut nunami aalisakkanik suliffissuarnut imermik akikillisaaffigisarai, maannakkutut ikkunnaarluni Nuummiunerusut ataatsimoorullugu kiassarermik atuisunit akilernerqartarunnaarsillugit.

(Inatsisartunut ilaasortat Siverth K. Heilmann aamma Steen Lyngø, Atassut)

Inuit Ataqatigiinni isumaqarpugut, nunatsinni tamarmi sarfamut imermullu akigitinneqartut aaqqissuunerqarsimanerat tamakkiisumik nalilersuiffigeqqinneqartariaqartut.

Atassutip matumani siunnersuummini, aalisakkanut suliffissuit sarfamik imermillu atuinermini akikillisaavigneqartarnerat kikkunnit akilernerqartassanersoq naqissuserneqaqquvaat, tassalu toqqaannartumik sineriammi sarfamik imermillu atuisunit akilernerqartaleqqullugu.

Tamanna uagut isumaqatiginngilarput. Ullumikkut takusinnaareerparput pineqartuni inuiaqatigiit nammaqatigiinnerisa qimakkiaartuaarneqarnerat qanoq kinguneqarnerasoq. Ullumikkorniit nammaqatigiif-fiunnginnerusumik aaqqissuussisoqqinnissaa inuiaqatigiit nammassinnaangilaat.

Nukissiorfiit kiassarinnikkut assigiikkannersumik akeqartitsinerat uagut isornartoqartinnngilarput.

Atassutip siunnersuutaata siunertaa akerlerigaluarlugu, aalisakkanut suliffissuit akikillisaavigneqartarnerisa aammalu sarfamut imermullu akigitinneqartut oqallisiginissaannut ammaasimmat nuannaarutigaarput.

Aalisakkanut suliffissuit akikillisaavigneqartarnerat ileqquliussaanaannani pisariaqartitsinermiit aallaaveqassasoq pingaartippaarput. Isumaqarpugut ullumikkut aningaasat akikillisaataasartut siunnerfilerneqartariaqartut nunatsinni aalisakkeriviit tamarmik sarfamut imermullu assigiimmik akeqartitsiviunissaannut.

Atassut naalackersuisooqataalluni Naalackersuisooqatigiit anguniagassamissut siunniussaannut akerliulluinnartumik siunnersuuteqarnera tupinnarpoq. Naalackersuisooqatigiimmi ima anguniagaqarnertik nalunaarutiginikuuaat, issuaaneq aallartippoq :” Innaallagissamut, imermut kiassarermullu akigitinneqartut nammaqatigiinneq naapertorlugu naleqqussaavigneqarnissaat Naalackersuisooqatigiit suliarissavaat. Taamaaliornikkut Nunatsinni ilaqutariinnut aningaasaqarniarnikkut tamatumani atugarisat naligiinnerulersinneqaqqullugit”.

Innaallagissamut, imermut kiassarermullu akigitinneqartut nammaqatigiiffioqqinnerulernissaannik noqqaaneq naapertuuppoq, siorna junip sisamaanni Inatsisartunut ilaasortap Juliane Henningsen-ip apeqquteqaat aallaavigalugu oqallisissiaa sammineqarmat, partiinit amerlanerusunit isummiunerqartumut.

Sarfamut imermullu akigitinneqartunut nammaqatigiinneroqqilernissamik noqqaaneq piviusuusimappat naalackersuisooqatigiit ersarissumik siunnerfeqartariaqarput. Naammanngilaq naalackersuisooqatigiit isumaqatigiissummini allassimasaat, naalackersuisooqataasut arlaasa siuniussa qimattorlugu siunnersuuteqartassappata.

Aammami Naalackersuisut 2015-mut aningaasanik inatsisissatut siunnersuummini konto 73.94.02 ilaatigut ima nassuiaatitallarsimavaat: “ 2011-mi aningaasaliissutinut sanilliullugu 10 mill. kruuninik ikilineqarput kiisalu ukiuni missingersuusiorfiusuni tamani 2016-miit 2018-mut suli allanik 10 mill. kruuninik Naalackersuisut Nukissiorfinnut tapiissutaasartut unitsikkiartuaarnissaannik aalajangiinerisa

kingunerisaannik. 2015-mi ukiunilu tulliuttuni ikilisitsineq maannakkut akigititaasunik (assigiimmik akeqartitsinermik iluarsaaqqinnermik) allangortitsinikkut **aamma Nukissiorfiit sullissinerinut atuisut annertunerujartortumik akiliisalernerisigut naammassineqassasoq naatsorsuutigineqarpoq.**”

Februar-imi ukioq manna Naalackersuisut siulittaasuannit atsiorneqarsimasut siunnersuutit taama ilaqarput.

Naalackersuisooqataasut Atassutikkut siunnersuutaat, akiliinerusareersut suli akiliinerusalernissaannik kinguneqartussa q Naalackersuisullu aningaasanut inatsisissatut siunnersuumminni anguniagaat, nammaqatigiinnerup nukittorsarneqarnissaannik siunnerfeqanngillat.

Taamatut oqaaseqarluta oqaatigeqqissavarput siunnersuut itigartikkatsigu, aalisakkanulli suliffissuarnut akikillisaataasartut aaqqissuusivigeqqinneqarnissaat siunniullugu ataatsimiitsitaliamut susassaqartumut ingerlatinneqassasoq siunnersuutigaarput.